

LA CARTA A LOS HEBREOS

Jesucristo m̄i ño Dios cheẽ mbuchecua nguiã

¹ Dios que ucheẽ mbiassa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiassa asa ee ra. Dios cheẽ mbuchecua checuasa atate que aque mose ra.

² Eĩ eã ño namo nde. Jesucristo m̄i ño Dios cheẽ mbuchecua checua nguiã nande je co cote. Dios nguiirĩte mbucheẽ nande je cote. Ae m̄i ndese chõ ngue Dios ibi ao nyii ra. Dios que em̄i mbae ja rerecuarã nda.

³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacuã nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriirĩ tuchi” i chõ Dios nguiã ee.

⁵ ã ngue Dios ñee ãte ángeles mo je ra:

Seriirĩ ño nde re.

Ndereco que amee ndeje ra,

i ãte que Dios ángeles mo je ra.

Nderu chõ se re.

Seriirĩ ño nde re,

i ãte que Dios ángeles mo je ra.

⁶ Dios nguiirĩ mbu mose íbii que ñee nda:

Sã ángeles riqui adorar i ja seriirĩ je,

i que ra.

7 ã ngue Dios ñee ángeles rĩĩ nda:
 Quiririã tu asi rã tuchi chõ ángeles re.
 Serimba chõ ángeles re.
 Tata rendi rã tuchi,
 i que Dios ñee ángeles rĩĩ nda.

8 Nguiirĩ je quiatu que ñee ã nda:
 Nde rei Dios. Ererecuarã mbei ra nde.
 Ererecuaturã tuchi ereico nde co.

9 Mbae turã eresaã sete quia co.
 Mbae icuã nguia erechousei chiãte nguia.
 Nyebe Dios riqui nguia nembia tuchi nderesenda
 mo si.

10 Nde que mbae erechao ja tuchi ibi jenda nyii ra.
 Ndeo je que ibei erechao no nda.

11 Ûquĩ nda ua ja chee.
 Nde quia ra ereico bei.
 Tiru ima na ja chee ra ãquĩ.

12 Sã mbia riqui tiru ima mombo no.
 Eyasu rerequia erendaque re.
 Eĩ si ra ibi cote. Ibei abe no.
 Nde quia ra eĩ mbei ereico.
 Eremanoa mbei ra nde quiatu,
 i que Dios ñee Jesucristo je ra.

13 ã ngue Dios ñee ãte ángeles mo je ra:
 Ecoi sejii. Nde abe ra ererecuaserese.
 Ae ndeucuãyte quia nae, ãquĩ je ra ndequirãcuã
 ateacuquia tuchi.

Ndequirãcuã tuchi chee ra ãquĩ si,
 i ãte que Dios ángeles mo je ra. Jesús mii je que ñee
 ãquĩ nda.

14 Dios riirĩ eã ño ángeles re. Dios rimba chõ ñene.
 Ae ra Dios mingo bei, ãquĩ ndaarõ sacua ño ngue
 Dios ángeles mii nguia.

2

Nandeichayã sacua Dios icha si

¹ Ae nandechandu quia Dios cheẽ nae, ãquĩ ndese nandeico ndua tuchi. I nda nandeichayã mbei Dios icha si.

² Ae rĩ ángeles riqui ñee mbia je cose nae, ñee ñooñoa tuchi chõ ñene. Ae ãquĩ ñee mumba nae, mbae rasi que esaã cote ra.

³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiasa nande je cote ra. Nande echeẽ mumba mose ra mbae rasi nandesaã tuchi nande quiatu cote.

⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. —Jesucristo ñee ñooñoa ño nguia re, i sacua mbia que Dios Espiritu Turã mondo mbia je no nda. Ae je Dios Espiritu Turã mondo mondo sete nae, ãquĩ je chõ ngue Espiritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles.

⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Õquinde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja riĩ ño ñee nguiã. Mbae mbia cheẽ mumbate raque quia ã.

⁹ Jesús mi ndese chõ nandeco nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emi mbia rerecuarã tuchi cote ra.

¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbiam tubiriã mingo bei sacua ño ũquĩ nde. Jesús mbae rasi raã mose, ererecua turã tuchi sacua ño ũquĩ nde.

¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ ngũiã nande je.

¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,

i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriirĩ Dios chimondo rese a,

i abe que Jesús cheẽ huĩ nda.

¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua.

¹⁵ Ae siquiche beite quia umano si nae, mbae icua nimba raanguia chõ ũquĩ nde. Ũquĩ siquiche eã sacua ño ngue Jesús mano nguiã.

¹⁶ Angel sacuã eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacuã.

¹⁷ Nyebe Jesús ru nguiã mbiarã nande rã. Ñee turã sacuã Dios je nande ríí. Dios nandembasi eã sacuã nandeicuã nîi. Jesús siqui mose mbiarã ngue mano mbia icuã nîi nda. Mbia icuã mbutiã sacuã esi.

¹⁸ Mbae icuã ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icuã tã i mose nande je.

3

Jesús quia rei i tuchi Moisés si

¹ Seresenda, Dios que jemîi icúe umbaerã tuchi ra. Nyebe aico nguiã ñee tuchi Jesucristo ríí jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote.

² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no.

³ Jesús quia rei i tuchi Moisés si. Ae que Moisés chao ra. Sã emo ndiqui tuchua ao no. Tuchua aosa quia rei i tuchi tuchua uchiao si.

⁴ Mbia mo tuchua chao arondete raque. Dios mîi nguia rei mbae ao ja tuchi.

⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ãnda Dios saã je mbia je, i chõ ngue Moisés quia ra.

⁶ Cristo quia rei i tuchi Moisés si. Ae quia rei Dios riirĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã

nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyo: Dios récuua

⁷ Jesús quia i tuchi re. Nyebe Espíritu Turã ndiqui nguiã ñee nande je ã:

Dios cheẽ jeñandu rã namo.

⁸ Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no.

Ûquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui mingüete quia ãquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui mingüete nande je”, i rei que mbia jenamei nguia cose ra.

¹⁰ Nyebe Dios paama i nguiã ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyo: serécuua”, i tuchi que Dios erĩ nda,

i que Espíritu Turã ñee embesa ji huĩ nda.

¹² Cochee chõ jẽingo, Seresenda. Jẽicha eã sacua Dios reco si jeñiangui re. Dios jẽicua bei sacua jeñiangui re no.

¹³ —Nandeico i i tuchi quiatu quia Dios rese, jenye jenye bei quiatu quia jenyue. Jendeco mose íbii. † nda mbae icuã jembirĩ irĩ eã. † nda jẽteã teã eã Dios cheẽ je no.

14 Sã nande Cristo nandeicua raque nyii no, eĩ nande bei chõ nguia eicua i i. Ñquĩ mose ra Cristo resenda tuchi nande cote.

15 Sã embesa ji riqui ñee ã no:

Dios cheẽ jeñandu rã namo.

Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no,

i que embesa ji ra.

16 ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ñquĩ ño ngue resẽ.

17 ¿Aba je chõ Dios paama i cuarenta años cose chã? Ae mbae icuã saã saã nae, ñquĩ ño ngue resẽ. Nyebe mano mano nguia turúquiaa.

18 ¿Aba je chõ Dios ñee tuchi chã? —Jenguenea nda jẽucuyã mbei oso serécuaa, i chã. Ae echeẽ mumba quia nae, ñquĩ je chõ ngue re.

19 Nyebe ngasẽ eã nguia Dios récuua. Dios icua eãte quiatu ngue re.

4

1 —Ae seicua quia nae, ñquĩ nda nyoĩ serécuaa, i chõte Dios quia nande je co. Nyebe nandeico cochee. Cochee jẽingo eã mose, jemo jengasẽ eã arõte Dios récuua.

2 Nande abe je chõ Dios riqui nguia ñee co. —Ae seicua quia nae, ñquĩ nda nyoĩ serécuaa, i. Moisés reco mosenda achõ je eã ño ngue ñee nguia. Ñquĩ ngue Dios chandu iru chooño nda. Dios icua rocoĩ.

3 Ae Dios icua quia nae, ñquĩ achõ ño nda nyoĩ ngasẽ Dios récuua. Uquenea ucuu sacua huee. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serécuaa,
i que ra. —Ma siqui serese, i bei rei que equia
eraarõ arõ nda. Ibi ao mosenda bei.

⁴ ã mbesa ji que chĩ nda:

Dios mbae ao jare que uqueneã ucua séptimo día
ra,
i que embesa ji ra.

⁵ ã abe que chĩ embesa ji rese ra:

Uquenea nda eucua eã mbei nyoĩ serécuaa, i que
embesa ji huĩ no nda.

⁶ Emo emo abe ra Dios icua. Siqui sacuaã erécuaa.
Ae Dios cheẽ ñandu nyii nae, ãquĩ ngue Dios icua
eãte ra. Nyebe ngasẽ eãte nguiã Dios récuua. Dios
cheẽ nguiatu ngue emumbate nguiã.

⁷ Nyebe Dios riqui nguiã ñee nande je quiatu co.
Nandeico sacuaã erese namo. ãquĩ echeẽ mumbare
nyii. Sã David Dios cheẽ mbesa no:

Dios cheẽ jeñandu rã namo.

Jeñia ãtãte ra jẽingochĩ, i que Dios ra,
i que David embesa ra.

⁸ Josué que mbia isrealitas miĩ aroneate Dios
récuua ra. Uqueneã ucua sacuaã. † nda Dios ñee ãte
rei. —Taemingo serécuaa jenguenea ucua sacuaã, i
ãte rei.

⁹ Nyebe ra Dios quiato nyoĩ ngasẽ Dios récuua.
Huee ra uqueneã ucua tuchi huee cote.

¹⁰ Ae ra ngasẽ Dios récuua nae, ãquĩ nda uqueneã
ucua tuchi. Sã Dios uqueneã ucua tuchi mbae ao
jare no.

¹¹ Nandechimbirãcuã tuchi oso nonde Dios
récuua. Nandequenea ucua sacuaã. Ae Dios

icuayãte quia cose nae, ùquĩ na nda nandeicochĩ nande mo namo jẽ.

¹² Dios cheẽ nguia rei ereco tuchi. Equirãcuã tuchi. Ique tuchi aba chiangui re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chioseĩ oseĩ abe mbuchecua tuchi aba je no.

¹³ Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande rĩ

¹⁴ Jesús rei Dios riirĩ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeico tuchi quiatu quia erese.

¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda.

¹⁶ Nyebe nandesiquicheã nguiatu quia Dios riichã. Nyesecuate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguiã mbia rĩ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icuã mbutiã sacua esi.

² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quirãcuã nea je. Mbia aquiatuã je abe. Mbia icha icha je abe no.

³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicuã mbutiã sacuaã esi. Mbia chisaã icuaã abe mbutiã sacuaã esi no.

⁴ “Sacerdote rerecua se” i aroneate emo, Dios eirabo eã mose. Dios ae que sacerdote mĩ mĩ nda. Sã Aarón mĩ cose no.

⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emĩ nguiã. Sã Dios cheẽ mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no.

⁶ Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no.

⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacuaã esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra.

⁸ Dios riirĩte raque Cristo. Mbae rasi que esaã tuchi ra. Ñimbaaquiato chõ ngue equia ãquĩ ndese Dios cheẽ mumbayã nda.

⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ãquĩ emingo bei quia co.

¹⁰ Dios quiatu ngue em̃i nguiã sacerdote rerecuarã. Melquisedec na si no.

Jeñimbaaquiatuã mbei chõchĩ equia Cristo rese ã

¹¹ —Mbae tasenei tuchi Jesucristo rĩĩ jẽje, ae rei que se ra. Jẽ nguia secheẽ jeñandu sereãte nguiã. Nyebe aico nguiã embiasa asa aroneate jẽje co.

¹² Cosete que jẽingo rei Jesús icua resẽ. ¿Mbaerã jẽingo ñimbaaquiatuã mbeite re? † nguia nda jẽingo nguiã emo mbaaquiatu quiatu chã. Jẽaquiatuã mbei chõchĩ. Dios cheẽ aba ch̃icua jẽicuayã mbei chõchĩ. ãquẽ na ño jẽingochĩ ã. Sã ãquẽ ndiqui usi quiandi achõ mbei no. Soo quiatu eu aroneate nguiã.

¹³ ãquẽ na jẽingo bei mose, jẽaquiatuãte siqui mbae turã ndese.

¹⁴ Ae ñimbaaquiatu quiatu tuchi quia Cristo rĩĩ nae, ùquĩ nguia rei mbae turã icua tuchi, mbae icuã icua rocoĩ. Mbia cuasu rã ño ùquĩ nde.

6

¹⁻² Ae rese jeñimbaaquiatu nyii nae, aba ch̃icuate ùquĩ. Ùquĩ m̃ite rese jẽingochĩ nguiã. Mbae aba ch̃icuayã mo abe jẽicua jiri Jesús rĩĩ ae. ã aba ch̃icua que asenei ja jẽje nyii ra: —Jenyisaã mbae icuã si jẽhui, ae que jẽje nyii ra. —Dios jẽicua, ae que jẽje nyii no nda. Bautismo abe que asenei jẽje nyii ra. —Jẽo jeñono Jesús quiato arõ, ae que jẽje nyii no nda. —Mbia raque ra quera si, ae que jẽje nyii ra. —Mbia Dios quiatoã nda mbae rasi saã tuchi tata cuásuu, ae que jẽje nyii no nda.

³ Ùquĩ aba ch̃icuate riqui ã ndesẽ. Aba ch̃icuayã tasenei jẽje cote, Dios “eno” i mose.

⁴ Emo emo ngue siqui rei Dios quiatorã nyii ra. Dios chimee icua raque nyii. Espíritu Turã abe icua raque nyii no.

⁵ Dios cheẽ turã abe icua raque nyii. Dios quirãcuã abe icua raque nyii no.

⁶ Ũquĩ hui mose Dios si, uba si aroneate erese cote. Jesús mbucha si chõ nguiã ira rese ũquĩ. Iquia icua chõ nguiã Jesús je mbia résaã ũquĩ.

⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote.

⁸ Nui achõ suri mose huee, eicuãte ũquĩ. Eĩ si chõ mbia Dios cheẽ andu chooñosa no nde. Eicuãte ũquĩ. Ũquĩ nda Dios mombo chõ tata cuásuu.

Dios ra ucheẽ mbuchebiã mbeĩ

⁹ Jeni aico nguiã ñee eã, Seresenda. Dios cheẽ jeñandu chooño eã nguiã jẽ ndeae. Jesús jẽicuate quia ũquĩ. Nyebe jẽingo tuchi quia erese ũquĩ ndeae.

¹⁰ Dios turãte eriqui co. Tesareiã nda jenyisãã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ũquĩ.

¹¹ Eĩ jenyẽ bei quiatu equia nyesecua bei emo ndese. I nda Dios mbae mee tuchi je jẽje.

¹² Jeñimbirãtã mbeĩ chõ nguiã mbae raã jẽ. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguiã ee. Eriqui beite mbae mee mee ee co.

13-14 Sã Dios ñee Abraham je cose no: –Taico turã mbei ndeje. Nderiirĩ nducucha tubiriã ndae, sã i Dios Abraham je no. Ñquĩ mose que Dios jurar i umbae nombre rĩnda.

15 –Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriirĩ mondo chee ee ucheẽ nguire cote ra.

16 Mbia jurar i mose, Dios rĩ ño eriqui nguia jurar i. –Ñquĩ nda asaã eã, i aroneate cote, jurar ire nyii.

17 –Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? –Dios ra ucheẽ mbuchebiã, i sacua mbia chõ ñene. –Dios ra ucheẽ nyabi i eã, nande i sacua ño ñene.

18 Dios “mbae tasaã jẽje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguia nanderaarõ turãte nandeso mose erichã. –Taemingo bei, i mose Dios nande je, ucheẽ nda embuchebiã.

19 –Dios ra semingo bei ibate ucheẽ nguire, nande equia ã. Nande ñquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios rĩchã sacua no. Eĩ nande chõ nguia nande abe Dios rĩchã, nande eicua mose.

20 Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderĩ pe. Sã sacerdote riqui ñee turã mbei Dios je mbia rĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra.

² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no.

³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda.

⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no.

⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra.

⁷ Ae bendecir i nae, aque quia rei i tuchi bendecir i ji si.

⁸ Ae mbia décimo isi isi quia uataque si ã nae, mbiachõ ño ãquĩ nde. Ûquĩ mano arondete. Melquisedec quiatu que mano eã mbei ra.

⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ûquĩ décimo isi isi raque nguesenda si.

¹⁰ Abraham ngue ãquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. † nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã.

¹² —Sacerdotes ra nyuuru uru eã ngõngue rendaque re cote, i que Dios aque mose cote ra. — Jesús mii nda siqui sacerdoterã mbei cote, i que Dios cote ra.

¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquiã ndaque sacerdoterã cose. — Ûquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús mii nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei.

¹⁶ Moisés chimbesa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co.

¹⁷ Sã Dios ñee ee embesa ji rese no: Nde quiatu ereico bei nguiã sacerdoterã mbei co. Melquisedec na si,

sã Dios i ñee ee no.

¹⁸ —Sacerdotes ra nyuuru uru eã ngõngue rendaque re cote, i que Dios aque mose cote ra. Ñquĩ nguiatu ngue mbia mingo aroneate nguiã Dios rese.

¹⁹ Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote.

²⁰⁻²¹ —Sacerdoterã nde, i mose emo je nyii, emo ngue jurar i ãte quia ra. Dios Jesús miĩ mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei. “Nde quiatu ereico bei nguiã sacerdoterã mbei co. Melquisedec na si”, i que Dios cheẽ huĩ embesa ji rese ra.

²² Ae contrato Dios saã mbia je nyii nae, ñquĩ contrato que mbia mingo eã Dios rese ra. Ae contrato Dios saã Jesús riĩ namo nae, ñquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra.

²⁴ Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote.

²⁵ Ae ra Dios siichã Jesús riĩ nae, ñquĩ nda Jesús mingo bei tuchi. Jesús quia siqui beite nguiã co, ñee turã sacua Dios je ñquĩ niĩ.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embicua aronea tuchi

quia ra. Ae quia ibatenda rerecua tuchi riqui nguiã namo co.

²⁷ Jesús quia rei sacerdote rerecua ataque rã eã tuchi. Ũquĩ nguiatu ticuasú quishĩ quishĩ mbeite nguiã sacrificio raã naa. Dios eicuã mbutiã sacuaã esi. Mbia abe icuã mbutiã sacuaã esi. Jesús quiatu ngue ticuasú mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacuaã. Mbia icuã mbutiã ja sacuaã ño ngue mano nguiã aque mose.

²⁸ Mbiachõ ño ngue sacerdote rerecua ja ñiinda ra. Ũquĩ ngue mbae turã saã mbei aroneate quia ra. Dios quiatu que Jesús mĩi sacerdoterã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quiti nande je huee.

² Hue eriqui mbae raã naa Dio s chuchua ibaténdaa huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re.

³ Sacerdote rerecua ja chõ sacrificio raã naa sacuaã nde. Nyebe Cristo abe sacrificio saã nguiã umano mose.

⁴ Ae sacrificio Cristo saã nae, ũquĩ nguia eturã tuchi sacerdote chisaã si re. Cristo siqui mose ibii, eĩ nda sacerdote eãte rei ae. Moisés chimbese cheẽ ndui achõ ño sacerdotes ibi jenda riqui nguiã sacrificio raã naa ã.

⁵ Ae sacerdotes ibi jenda saã saã nguia mbae nae, ibei jenda rese aba mundua sacua ño ñene. Sã Dios ñee Moisés je Dios chuchua ao nonde no. — Ndeico mose ibi ibátee que sechuchua ibei jenda ateacuquia ndeje, ùquĩ na si chõ sechuchuarã ibi jenda esaã, i que Dios ñee Moisés je ra.

⁶ Ae contrato Dios saã mbia je nyii nae, mbaranquiataũte que ùquĩ nda. Ae contrato Dios saã nande je namo Jesús rĩĩ nae, eturã tuchi chõ ùquĩ cote re. — ã tasaã jẽje. ã abe tasaã jẽje no, i tuchi Dios quia contrato namonda rĩĩ nande je co.

⁷ Contrato ñiinda mbia mingo bei mose Dios rese, ã nda contrato yasu raã eãte rei nande je.

⁸ Dios ia eãte que eriqui mbia aque mosenda rese ra. Sã embesa ji riqui no:

ã ño ngue Dios ñee nguĩã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ùquĩ namei je nyii nae, ùquĩ contrato rã eã nda eyasu asaã cote.

Mbia arao quia Egipto si nae, ùquĩ mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ.

Contrato raande que secheẽ mumba mumba chõ nda.

Nyebe ùquĩ asecha chõ nguĩã, i que Dios ra.

¹⁰ Ae contrato ra asaã je Israel jenda je, ã ndei e ã: Secheẽ nda amiĩ tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ùquĩ.

11 Seicua ja tuchi rae. Mbia cuasu ja.

Eñetē abe ja chee.

Seicua ja mose, ũquĩ mose emo uataque
mbaaquiatsu quiatsu aroneate serĩ cote.

Seicua ja tuchi quiatsu ra aque mose.

12 Ũquĩ icuã nda ambutiã ja esi.

Atesarei bei ra eicuã si,

i que Dios cheẽ huĩ embesa ji rese ra.

13 —Contrato yasu tasaã, i que Dios cote ra. Contrato ñiinda imate quiatsu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

1 —Eĩ jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda rĩ ño eriqui nguĩã ñee, “sechuchua” i mose.

2 Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chĩ huee no nda.

3 Cortina mbucheseco ji que sigui tuchia ite rĩ nda. Aque quitera quiti que cuarto nongue ñi nda. Lugar Santísimo, i que hue cuarto je ra.

4 Huee que altar mo ñi oro ao ji ra. Mbae shimbu turã ndei sacuã. Ira ao ji mbae riru mo abe que chĩ huee ra. Oro quiti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye

ra. Mbichae resebe que eñi nda. Maná i equia ee. Aarón chitochoquia ruri abe que chí mbae riru imi ye no nda.

⁵ Angeles raanguia ao ji que chi ibate mbae riru arõ nda. Querubines, i que ñquĩ je ra. Ujeo que embiitee u mbae riru arõ nda. Sacrificio renda rei mbae riru. Ñquĩ cuartos nyeremo jenda asenei ja aroneate jẽje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je.

⁷ Cuarto cortina quitera quitinda quiarei mbia mo ique aronea tuchi. Sacerdote rerecua miñ ño ngue i que quia huee ra. Ique chiibe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huique mose huee ra. Dios eicuã mbutiã sacuaã. Mbia icuã abe mbutiã sacuaã.

⁸ Aque mose bei que mbia mo ndiqui ique aroneate Lugar Santísimo nda. Dios ríchã tuchi sacuaã. Ñquĩ ndese Espíritu Turã ndiqui urembi-irandute ã.

⁹ Sacerdotes que ticuasu iquia iquia tuchi rei quia aque mose ra. Ñquĩ ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ñquĩ nda. Ñquĩ nandeicuate quia ã cote.

¹⁰ Contrato ñiinda que mbia mingo turã aroneate quia ra. Mbae riñ achõ ño ngue eriqui nguiã ñee. Mbaeiae riñ. Mbia chiu riñ. Mbia chimbei riñ. Mbia choita riñ. Ñquĩ niñ ja. Ñquĩ ñee ndui sí chõ ngue mbia riqui rei nguiã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra.

Ae m̄i ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe.

¹² Cristo quiatu ngue ticuasú ruqui sii sii eã u nguiã nande je. Chivo ruqui abe. Nguqui ae je chõ ngue nande icuã mbutiã nguiã. Mano m̄i ngue mbia ja je ra. Mbia mingó beí sacuí cote.

¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riri ndaaque rei ji cusubu abe no.

¹⁴ Cristo ruqui quia rei equirãcuã tuchi ùqui mbae ruqui si. Cristo ruqui m̄i nguia rei nandendua nduasa mbitirõ tuchi. Ae ruqui m̄i nguia rei nandemingo turã Dios reco rese. —Se ae tamano mbia icuã mbitirõ sacuí. Mbia mbae turã naa naa sacuí Dios je cote, i que Cristo mano nda. Mbae icuã mo ngue esaã jiri jiriã tuchi ra. Espiritu Turã ngue síqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo eri chã tuchi sacuí cote. Dios chiirabo síqui tuchi sacuí erese Dios cheẽ nguire. Sã Dios ñee ee nyii no. —Jẽingo beí ra serese, i ee no. Ae je Dios contrato saã ndei quia nyii nae, ùqui icuã n̄i ngue Cristo mano nda.

¹⁶ Ae contrato Cristo saã nande je nae, testamento chõ ùqui nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote.

¹⁷ Testamento raãsa manoa mose, testamento chõ ño ño aque mose re.

¹⁸ Dios contrato ñiinda raã namo mose que ticuasú quia quia mbia je ra.

¹⁹ Moisés contrato ñiinda raã mose, Dios cheẽ

ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no.

²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacuaã jẽje, i que Moisés ñee mbia je erii rii cote ra.

²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda.

²² Contrato ñiinda mose, mbae ruqui achõ je chõ ngue Dios riqui nguiã mbia icuaã mbutiã esi. Dios que mbia icuaã mbutiã chooño eã nda. Mbae quishĩ mose bei quiatu ngue eriqui nguiã mbia icuaã mbutiã mbei esi.

Cristo m̃i aba icuaã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitirõ sacuaã nda. Ibatenda quiatu que embitirõ eã mbae ruqui je ra. Cristo ruqui m̃i je quiatu que ra.

²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee.

²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacuaã mbae ruqui

je. Nguqui j e eã ño ñene. Cristo quiatu que mano mii nda. Nguqui que eichusẽ tuchi nande je ra.

²⁶ Cristo que tu mii ibi ra. Mano mii sacuaã nande je. Nandeicuã mbutiã sacuaã. Mbae ua serĩ mose que eru mano aa ra. Mano nyibeĩ ibei eã equia co.

²⁷ Sã mbia riqui mano mii no. Sã Dios riqui ecuata mee aquere no.

²⁸ Eĩ si que Cristo mano aque mii no nda. Mbua icuaã ja mbutiã sacuaã esi. Cristo ra tu si ibii emo mose. Aque mose ra manoa mbua icuaã ndiquicharõ cote. Uquiato mingo bei sacuaã nguiatu ra eru. Ae esaarõ arõ nguiã nae, uquiã mingo bei sacuaã.

10

¹ Moisés chimbesa que mbua mingo turã eã ndaque ra. Mbua mundua ndua sacuaã Dios riirĩ mano ndese chõ ngue re. Ticuasua mbua quishĩ nyibeĩ ibei rei quia nae, uquiã nduqui que mbua mingo turã eã no nda.

² Uquiã mbua chiã mbitirõ mbei mose, eĩ nda sacerdotes equishĩ nyibeĩ ibei ate rei. Eĩ nda ticuasua mii quishĩ ndei mbua mbitirõ ja sacuaã. Eĩ nda mbua tesarei rei huicuã si.

³ Mbua ticuasua quishĩ nyibeĩ ibei mose, uquiã ngue embutesareiãte huicuã si ra. Munduate quiatu que huicuã ndese ra.

⁴ Ticuasua ruqui ra mbua icuaã mbutiã eã mbei. Chivo ruqui abe no.

⁵ Cristo ruqui mii nguiatu mbua icuaã mbutiã nguiã esi co. Sã Cristo ñee Dios je siqui mose ibii no:

Ticuasú ruqui mbia mbitirõ eã mbeite quia ndeje
co.

Nyebe que serete ereme seje ra.

Se mano sacua mbia icua ñi.

⁶ Mbae raaque rei ji abe ndebiãte.

Ticuasú mbia quishĩ quishĩ nguia huicua ñi nae,
ũquĩ abe ndebiãte no.

⁷ Nyebe ngue acheẽ nguia ndeje: “Ae ndebite nae,
ũquĩ ndese seico sacua ño ngue achu nguia.

Sã embesa ji riqui ñee serĩ no, ãquĩ ñee nguire que
achu ra”, ae que ndeje ra,

ĩ que Cristo ngu je ra.

⁸ Nyebe Dios biãte riqui nguia sacrificios. Mbia ticuasú quishĩ quishĩ mose huicua ñi. Mbae raaque rei ji abe ebiãte no. —ũquĩ jesaã saã, ĩ raaque Moisés chimbesa huĩ.

⁹ —Ae ndebite nae, ãquĩ ndese seico sacua ño ngue achu nguia, sã Cristo ĩ Dios je no. Mbia mbui sacua sacrificios raã naa si chõ ngue eru nguia. Sacrificio mĩ tuchi que esaã u mano mbia icua ñi nda. Cristo ruqui mĩ ño mbia icua mbitirõ mbeĩ nguia co cote. Sacrificio raã ĩ ĩ rocoĩ.

¹⁰ Ae Dios bite nae, ãquĩ ngue Jesucristo saã tuchi u ra. Mano mose mbia ja icua ñi. Mano mĩ tuchi que u ra. Nanderirõ mbeĩ que nandecua si cote ra.

¹¹ Sacerdotes riqui beite raaque Dios chuchua ã. Ticuasú equishĩ nyĩbeĩ ibeite raaque quia mbia icua mbutiã sacua ã. Ũquĩ nda mbia icua mbutiã eã mbeĩ.

¹² Jesucristo quiatu que mano mĩ aque mose beĩ ra. Mbia icua ndiquicharõ sacua ño ngue re. Aquere eñi ngoi beĩ Dios ribisho quitu nande je hue.

13 Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote.

14 Sacrificio mii ngue esaã nda. Aque mii sacrificio je que uquiato chiã mbitirõ ja bei ra.

15 Sã Espiritu Turã abe riqui ñee ãquĩ no:

16 Ae contrato ra asaã je judíos je nae, ã ndei e ã: Secheẽ nda amii tuchi echiangui re. Secheẽ nda amii tuchi eãquĩ ndese no.

17 Atesarei bei ra eicuã si, i que Espiritu Turã nda.

18 Dios nandecuã mbutiã mose, mbae mo nandeq-uishĩ aroneate quia nandecuã ndiquicharõ ã cote.

Dios nandesichã na

19 Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui riĩ nandequi Diósaa.

20 Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeco ique arõte Dios rea Lugar Santísimo ã cote. Cose ndare rã eã tuchi chõ cote re.

21 Jesucristo mii ndei sacerdote tuchi nande je cote. Dios quiato ja je cote.

22 Diósaa ra nandesiquicheã ique oso cote. Nandechiã turã ño nandeco oso Dios riichã. —Dios ra nandei turã, nande chõ nguia nandechiangui re. Cristo quiatu ngue nanderii rii nguia nguqui je nyii. Nandecuã mbutiã sacua nande si. I turã je que nanderei ra.

23 —Taemingo bei, i que Dios nande je ra. Ñeende ãquĩ nda ucheẽ mbuchebiã. Nyebe nandeco

quiату quia ñee: —Dios ra nandemingo bei ucheẽ nguire, i.

²⁴ Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesequa turã nguiatu quia nyiese. Mbae turã nandesaã uquia bei quiatu quia nandenongue je.

²⁵ Cristo quiato ñumunua nua mose, nandetesareiã mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguiã tu a.

²⁶ —Mbae icuã tasaã, nande i i mose Jesucristo icuare, emo nda manoa nandecicuã ndiquicharõ cote.

²⁷ Ûquĩ mose, mbae icuã nda nandesaã tuchi. Ûquĩ mose, nandeso chee ra tata cuásuu no. Huee ra Dios ucuãyãsa nyoĩ ja.

²⁸ Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etiisu isu eã tuchi eiquia ra.

²⁹ Dios riirĩ ucuãyãsa quia ra mbae rasi saã tuchi ãquĩ si. Cristo ruqui ucuãyãsa abe no. Ae Espiritu Turã isiteã teãte quia nae, ãquĩ abe no. Cristo ruqui je quiatu ngue Dios ãquĩ mñi ndei nguiã icúe.

³⁰ Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda.

³¹ Ae ra Dios mbasi eicuã nñi nae, mbasi tochi eã ndae. Aba mbusiquiche tuchi chõ ãquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã mingue que equia aque mose ra. Ûquĩ ndese jendua jiri ae.

³³ Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra.

³⁴ Jẽya eãte que eriqui mbia tarõ ji rese ra. Mbia jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei.

³⁵ Dios jẽicua bei quiatu quia aque mosenda rã mbei. Ûquĩ mose ra Dios mbae turã tuchi mee jẽje.

³⁶ Ae Dios bite nae, ùquĩ ndese bei chõ jẽingo. Ae mbae turã nda Dios mee jẽje nae, ùquĩ jẽsaarõ arõ mingue chõ nguia cote.

³⁷ Achite Jesucristo ñi tu a.

³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese.

³⁹ Nande quia ra nandehui eã mbei esi. Ae ra hui esi nae, ùquĩ nda Dios mbutiã. Nande quiatu Dios nandeicua tuchite nguiã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ùquĩ ña? Ae Dios icua nae, ùquĩ nda ñee. —Ucheẽ nguire ra Dios

mbae mondo seje, i rae. —Ae asaarõ arõ nguia nae, ãquĩ nda emondo seje ucheẽ nguire no, i ra eno. Mae eã ndaque erese.

² Dios quiato cose ndare que Dios icua tuchi quia ra. Nyebe mbia riqui nguĩã jirandu jate erese.

³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguĩã. —Co eturãte riqui seje co, nyebe Dios i nguĩã Abel nã. Nyebe mbia riqui nguĩã jirandu jate Abel rese.

⁵ Enoc que Dios icua ra. Nyebe Dios ererao nguĩã ibate emano mose rocoĩ. Mbuaate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc nã nyii reaẽ.

⁶ Emo Dios icua eã mose, ãquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios rãichã mose, Dios turãte ra ee, sã i quiatu no. Aquere quiatu ra Dios eisi turã cote.

⁷ Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguirĩ mingue sacua eye. Mbuaate que Dios icua eãte quia ra. Noé mã ão ngue eicua quia ra. Nyebe Dios Noé isi turã nguĩã.

⁸ Abraham ngue Dios icua ra. Nyebe Dios cheẽ mumbayã nguĩã. Dios que ãee ee ra. —Eso rã a

si. Ibi mo tamee ndeje mámbii, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii.

⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguiirĩ ndese. Isaac. Jacob abe no. Ûquĩ je abe que Dios ñee nda. —A ibi tamondo jẽ abe je, i.

¹⁰ Abraham quiatu que Dios icua tuchi quia ra. Nyebe ñee nguiã. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra.

¹¹ Abraham ninisi abe que Dios icua ra. Sara, i equia ee. Nyebe que nguiirĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra.

¹² Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quishĩ tubiriãte riqui no.

¹³ Ûquĩ ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ùquĩ ndurubi quiã ño ngue mano nda. —Dios ra emondo ure je uremanonde, i que eyate quia ndua ndua ùquĩ ndese ra. Ûquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra.

¹⁴ Emo ñee mose ùquĩ, siqui sete quiatu nguiã Dios récuua.

¹⁵ Ûquĩ ndua ndua mose nguecua rese nda nyoi

si nyebi re chã ae.

¹⁶ —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ãquĩ ndecua turana quereco co.

¹⁷ —Ma Abraham secheẽ mumbayã, i que Dios Abraham nĩi nda. —Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mĩi nĩi.

¹⁸ —Isaac nda tiirĩ tuchi ndeje, i rei que Dios ee nyii ra.

¹⁹ Abraham ngue Dios icua tuchite quia ra. — Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde.

²⁰ Isaac que Dios icua ra. Nyebe ñee nguiã nguiirĩ je. —Dios ra mbae turã saã jêje, i que Jacob je ra. Esau abe je.

²¹ Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jêje, i que ee ra. Uchitochoquia rese que nyeco rei nyibi ñee turã Dios je ra.

²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia

ee re. Nyebe eru riqui nguiã siquicheãte ererecua si. Esi abe.

²⁴ Moisés s abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã.

²⁵ “Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icuã ndese aba oote raque. Aba mbia mbirĩ ño ñene.

²⁶ —Taico chõ Dios rimba rese. Mbia ra sembasi mbasi raque Cristo rĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra.

²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Ñimbirãcuã turã mbeite que equia ra. Dios rese mae naanguia. Emo mae aroneate raque Dios rese.

²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jẽiquesa ja jẽsii sii. † nda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egipto jenda abe ra. I que tuchõ eati eiquia ja ra.

³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee.

31 Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ãquĩ ndese. Rahab que Dios quiato isi turã nda. Mbuchemi ngue ererecua icuã si ra.

32 ¿Aba rĩ abe ra aba ñee jẽje re? Dios quiato tubiriãte quiatu ñene. Ûquĩ asenei ja aroneate jẽje. Gedeón. Barac. Sansón. Jefte. David. Samuel. Dios cheẽ mbuchecuada ja rĩ.

33 Ûquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra.

34 Ûquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbua tiquise rerequia requia mose erese, Dios que etequiatu quia ãquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua.

35 Cuña abe que Dios icuate quia ra. Nyebe Dios eririã ndaaque mbuquera si nguiã ee. Emo emo abe que mbae rasi saãte quia Jesús rĩ nda. Hui sereãte quiatu que equia esi ra. —Sã sei quia rei. Dios ra sembuquera si nguiã. Serete mbuchi-icuabo turã ndae, i que equia ra.

36 Emo emo ngue ñimbirãcuã nguia mbia iquia iquia chooño mose ee ra. Mbua eiruã nua mose abe no. O cuaacua mose abe no. Utarõ tarõ mose abe

no. Hui eã mbei chõ ngue Dios si ra.

³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra.

³⁸ Ñquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ñquĩ ngue Dios icua tuchite rei quia ra. —Mbae turã tamondo jėje, i rei Dios quia ee nyii nae, mee jei eã ngue ee ra. Mee je quia ra ee cote.

⁴⁰ Ñquĩ mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ñquĩ ndese.

12

Jesús mii ndese nandendua ndua

¹ Sã Dios icuasa tubiriãte cose no. Ñquĩ na ño nandeico nande abe Dios icua tuchi. Ae nandembuti mbuti quia Dios si nae, ñquĩ si nandehui. Ae mbae icuã aba mbuchiishĩ arõte quia nae, ñquĩ si nandechiicuasẽ ño. Jesús mii ndui chõ nandeico ngata. Nandechimbirãcuã ño nguia siqui erese.

² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra.

Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondochi eã ngue ra.

⁴ Jesús miĩ ngue mano mbae icuã ndiquisã quisã sacuã mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguiatu ra.

⁵ ¿Embesa ji si jêtesarei chõ nde? —Seriirĩte quia jẽ nde, ite Dios quia jẽje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã niĩ, ereisiteã teãchĩ nda jẽ.

Dios ñee mose ndeje ndeicuã niĩ, echeẽ eisi turã ño.

⁶ Ae rese Dios nyesequa nae, mbae rasi ra esaanguquia ee eicuã mose.

Ae Dios isi nguiirina nae, ãquĩ je ra ñee eicuã niĩ, i que embesa ji huĩ ñee nda.

⁷ Dios “seriirĩ” i tuchi quia jẽje co. Nyebe eriqui nguiã mbae rasi raanguquia jẽje jẽicuã mose co. Sã mbia ja riqui nguiirĩ iruã eicuã mose no.

⁸ Dios mbae rasi raanguquia eã mose jẽje, eriiriã nguiatu rei jẽ.

⁹ Sã nanderu ibi jenda riqui nandeiruã nua nandẽnetẽ mose no. Nandembaaquiату sacuã. Sã nandeico echeẽ mumbayã cote no. Eĩ nande sí chõ Paba ibatenda je. Ae cheẽ nguiatu nandemumbayã tuchi. Ûquĩ mose ra nandereco siqui turã tuchi.

¹⁰ Sã nanderu ibi jenda riqui nandembaaquiату jua raque no. Nandeico turã sacuã aa íbii. Dios

quiatu nandembaaquiato turã tuchi nguiã nanderu ibi jenda si co. Nandechiã mbitirõ sacuã ae rã si.

¹¹ Dios mbae rasi saanguquia mose nande je, nandehosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cote.

Dios cheẽ nda jẽisiteã teãchĩ jẽ

¹² Jẽo tomei jembirãtã jiri ae. Jẽtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae.

¹³ Jẽingo tuchi quiatu quia erese. Ae ndua ata atate quia nae, ñ nda ãquĩ abe siqui tuchi chee erese chã.

¹⁴ Jẽingo turã mbia ja rese. Dios rã si chõ jẽingo. Dios rã si nandecoã mose, nandemae eã mbei ra erese.

¹⁵ Jenyiteaquiato turã ño nguia. ñ nda jemo Dios turã isiteã eã. Emo mbae icuã naa mose jẽje, jẽtesarei chõ esi. Jendua icuã icuãchĩ nda jenongue rĩ jẽ. ãquĩ mose ra jeñimbicuaã jate.

¹⁶ Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jẽisiteã teãchĩ jẽ. Sã Esaú no. Aque que umbae herencia mondo ja chõ soo ñetẽ ndibishorõ nda.

¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jẽje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que

eriqui ee ra. Ama ngue pirirã pirirã i tuchi quia ee aque mose ra.

¹⁹ Trompeta que nyuihui ee no nda. Dios que ñee ee cote ra. Mbia que Dios cheẽ ñandu sereãte ra.

²⁰ Dios quiatu ngue ñee nguiã nyii: —Emo oco mose sita ibate rese, ãquĩ jẽiquia. Mbae quiaa riinda abe oco mose erese, ãquĩ abe jẽiquia no. Sita je jẽiquia. Jeñio no ae, i quiatu que Dios ee nyii ra.

²¹ Aba mbusiquiche tuchi que mae mose ãquĩ ndese ra. —Aico titi titi i tuchi esi co, i chee que Moisés abe ra.

²² Eĩ jenye eã ño jẽ nde. Dios jembusiquiche ãte quia jẽ co. Dios recua jẽsichã tuchi quia jẽ ã. Dios reco chuchua. Jerusalén naanguia ibatenda jẽsichã tuchi quia jẽ ã. Angeles tubiriã abe jẽsichã tuchi quia ã no.

²³ Dios icuasa ñiinda abe jẽsichã nguia ã no. ãquĩ mbae nombres mbesa ji chi ibate pe. Dios abe jẽsichã nguia ã no. Ae ra Jesús quiatoã icuã tea tea ja emo mose. Mbasi ja rae. Jesús quiato mano je abe chõ jẽsichã ichã nguia ã no. ãquĩ ngue Dios mbuturã tuchi cote ra. Eicuã jiri jiriã tuchi chõ cote re.

²⁴ Jesús abe chee jẽsichãte quia ã no. Ae ruqui riĩ ngue Dios contrato yasu raã nande je ra. Ae ruqui rii ji jẽsichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jẽje co. Echeẽ nda jẽsiteã teãchĩ jẽ. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande je co. Ae cheẽ nandechandu sereã mose, mbae rasi ra esaanguquia

tuchi nande je cote.

²⁶ Dios cheẽ mose que ibi nyere nyere aque mose coose ra. —Namo nda ibi ambuchere si no. Ibi mii ño eã nda ambuchere. Ibei abe ra ambuchere no. Aque mii nda ambuchere cote, i Dios quia co.

²⁷ —Aque mii nda mbae ambuchere ja, i Dios quia co. Aque mose ra mbae ua ja Dios chiaõ. Ae ra siqui bei, ãquĩ achõ nda ua eã. Mbae ataque ra ua ja aque mose.

²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. ãquĩ mose ra eya tuchi nanderese.

²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jẽ. Nyiesenda chõ jẽ nde.

² Mbia ngaẽ mose jenyuchúaa, jëisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui reĩ nguia ee.

³ Etarõ ji rese jëingo ndua. Mbae turã jësaã saã ño nguia ee. Jëtarõ ji raanguia chõ jẽ abe erese re. Ae je mbia icuã icuã ndiqui nae, ãquĩ je jëingo turã ño. Sã jẽ abe jendete riqui no. Sã jẽ abe jëiruã nua arõte no.

⁴ Emo siqui mose ngüinisi rese, ãquĩ Dios bite. Sã emo ngüinisi resechõ ño siqui. Sã eriquiã emo ndese. Emo siqui mose emo ninisi rese, Dios ra

paama i tuchi ùquĩ je. Ae ninisi ãte riqui nae, siqui mose emo ndese, Dios ra paam a i tuchi ee no.

⁵ Mbae isiquia rese ra jendua nduachĩ jẽ. Jembae m̃i ndese chõ jẽya. —Jaendechayã mbei ra se, i quiatu Dios nguiã co.

⁶ Ae bei jẽ. Dios ra nanderechayã mbei. Nyebe nandeico nguiã ñee:

Dios riqui beite serese co.

Mbia mo si ra asiquicheã,
nyebe nandeico nguiã i ã.

⁷ Jenderecua rese jẽingo ndua. Ûquĩ ño ngue Dios cheẽ senei senei jẽje ra. Ûquĩ ndiqui Dios icuate ùquĩ. Eĩ jenye Dios icua jẽ abe ùquĩ na si. Ûquĩ nguia siqui turãte nguiã Dios rese ùquĩ.

⁸ Eĩ mbei chõ Jesucristo re. Cose mosenda bei. Namu abe chee. Eĩ mbei ra ae quia.

⁹ Mbia jembaaquiato ata ata mose, echeẽ si jẽhui chõ. Mbia jembaaquiato chooño mose, echeẽ si jẽhui chõ no. Ae je mbia riqui mbaeiaie i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguiã.

¹⁰ Jesús m̃i ngue mano nande je ra. Sacrificio rei ae m̃i nande je. Cose ndare rã eã namo cote re. Ticuasú ra mano eã nandeicuã mbutiã sacua cote. Jesús ruqui m̃i ño nandeicuã mbutiã nguiã co cote.

¹¹ Sacerdote rerecua riqui ticuasú ruqui rerao ra Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque.

¹² Jesús abe que mbae rasi saã ishó jiri sucha cuasu si ra. Mano tuchi que mbia mbitirõ sacuaã nguqui je ra.

¹³ Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese.

¹⁴ Nanderecua ibi jenda ra ua chõ. Dios ra nanderecuarã mee nande je ibate. Ñquĩ nguia ra ua eã mbei.

¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei erĩ.

¹⁶ Jẽingo turã ño nguia mbia je. Jembae jemee mee nguia emo je. Ñquĩ Dios bite.

¹⁷ Jẽingo turã jenderecua je. Echeẽ jemumbayã. Jenderecua riqui jendeaquiato quiato Dios je ñquĩ. —¿Jeteaquiato turãte equia re? i chee ra Dios ee. Jenderecua cheẽ jemumbayã mose, eyate ra ñquĩ mose. Echeẽ jemumba mose, eya eãte ra jendese. Jẽ abe ra jẽya eãte no.

¹⁸ Jẽnee mbei quia Dios je urerĩ. Ureico turã sete equia mbia ja je ã. Ureico ndua icuã icuã eãte emo ñĩ ã no.

¹⁹ Jẽnee tuchi quiato quia serĩ Dios je. fnda Dios semondo jei jendea.

Echeẽ hui bei

²⁰ Dios ae aba mombia nguia. Dios ae que Jesús raaque mbuquera si ra. Jesús ruqui rĩ ngue Dios ucheẽ yasu mee nande je ra. Jesús ruqui rĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co.

21 Sã Dios riqui jembuquirãcuã tuchi. ¶ nda jẽingo bei ae Dios bite ãquĩ ndese. Sã ae riqui tuchi nandechiangui re. Nandemingo tuchi sacuã ae ebite ãquĩ ndese. Jesucristo quiatote quiatu nande re. Sã mbia ñee turã mbei quiatu quia erĩ. Amén.

22 Seresenda, aico co mbesa juate jembiiirandu sacuã a. Secheẽ jemii tuchi rã jẽaquĩ ndese.

23 Aico jembiiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea.

24 Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque.

25 Sã Dios siqui turã jẽ ja je. Amén.

Mbia Cheë
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
eb2687f2-4654-5d43-8ec2-3ee35e8a435e